



Sud Bosne i Hercegovine
Суд Босне и Херцеговине

Broj: SI 3 Iž 031875 19 Iž
Sarajevo, 11.03.2019. godine

Sud Bosne i Hercegovine u Sarajevu, u apelacionom vijeću sastavljenom od sudija Mirsada Džindo kao predsjednika vijeća, Vesna Trifunović i Dinka Bešliagić Čovrk kao članova vijeća, odlučujući o žalbi političke stranke Narodna stranka Radom za boljitak sa sjedištem u Širokom Brijegu koju zastupa predsjednik stranke Mladen Ivanković izjavljenoj protiv odluka Centralne izborne komisije Bosne i Hercegovine broj: 06-01-07-1-95/19 od 05.03.2019. godine, o dodjeli mandata delegatu u Domu naroda Parlamenta Federacije Bosne i Hercegovine, u nejavnoj sjednici održanoj dana 11.03.2019. godine, donio je

R J E Š E N J E

Žalba se odbija kao neosnovana.

O b r a z l o ž e n j e

Odlukom Centralne izborne komisije Bosne i Hercegovine broj i datum naveden u uvodu, dodijeljen je mandat delegata u Domu naroda Parlamenta Federacije BiH iz reda srpskog naroda Bosnić Nikici kandidatu sa liste političkog subjekta Srpska lista BiH za Skupštinu kantona 10 za Opšte izbore 2018. godine.

Narodna stranka Radom za boljitak blagovremeno je uložila žalbu na odluku o dodjeli mandata delegatu u Domu naroda Parlamenta FBiH navodeći da žalitelj ima kandidata iz reda srpskog naroda Milana Balabana koji je ostvario drugu poziciju sa 387 glasova. U kantonu 10 nije konstituisana vlast tako da je vlada u tehničkom mandatu, a prvorangirani Josip Tomić ukoliko uđe u izvršnu vlast, kandidat žalitelja bi ostvario mandat po samoj sili zakona. Žalitelj ima kvalifikovanog člana Skupštine Kantona 10, za razliku od kandidada kome je mandat dodijeljen osporavanom odlukom. Centralna izborna komisija BiH donošenjem kriterija nije ispoštovala Ustav Federacije BiH i Izborni zakon BiH jer dodjelom mandata kandidatima sa kantonalnih listi koji nisu osvojili mandat u kantonalnim skuštinama, nije ispoštovala načelo konstitutivnosti po kome prednost u popuni nedostajućih mandata treba imati kandidat iz onog kantona koji u prva dva kruga izbora delegata u Dom naroda nisu dobili ni jednog predstavnika. Predlaže da se odluka poništi, jer se napadnutom odlukom direktno krši volja birača da se dodjeli mandat po stranačkoj pripadnosti i izvan je zakona i Ustavom opredijeljenih principa.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbaci kao nedopuštenu jer je izjavljena u ime Skupštine Kantona 10 i delegata Milana Balabana i jer osporava normativni propis na kome se zasniva ožalbena odluka. U suprotnom predlaže da se žalba odbije kao neosnovana jer je osporavana odluka donesena na pravilna način i u skladu sa odredbama Izbornog zakona BiH i podzakonskih akata koje je CIK donio u cilju provođenja zakona.

Žalba nije osnovana.

Prema stanju u spisu predmeta, Centralna izborna komisija BiH je Odlukom o potvrđivanju rezultata posrednih izbora i dodjeli mandata za Dom naroda Parlamenta Federacije Bosne i Hercegovine dodijelila mandate za 14 delegata iz reda srpskog naroda i utvrdila da nedostaju 3 delegata iz reda ovog konstitutivnog naroda. Nadalje proizilazi da nakon procedure provedene u skladu sa članom 10.10. do 10.16. Izbornog zakona BiH nedostajući mandati nisu dodijeljeni, te je Centralna izborna komisija donijela Kriterije i postupak popune nedostajućih mandata u Domu Naroda Parlamenta Federacije Bosne i Hercegovine-Opšti izbori 2018. godine (Sl.glasnik BiH br.16/19). Na osnovu navedenih kriterija Centralna izborna komisija BiH donijela je osporavanu odluku kojim je mandat delegata u Domu naroda Parlamenta Federacije BiH dodijelila Bosnić Nikici kandidatu sa liste političkog subjekta Srpska lista.

Odredbom člana 2.9 stav 1 tačka 2 Izbornog zakona Bosne i Hercegovine Centralna Izborna komisija BiH ovlaštena je za donošenje administrativnih propisa za provođenje zakona. Primjenom ovog propisa doneseno je Uputstvo o postupku provođenja posrednih izbora za tijela vlasti u Bosni i Hercegovini obuhvaćenih Izbornim zakonom BiH (Sl. glasnik BiH br. 34/14, 90/16, 8/17, i 91/18) koje je u članu 37 stav 3 predvidjelo da ukoliko i u ponovnom raspodjeli ne budu dodijeljeni mandati donijeće se poseban akt koji će propisati način popune nedostajućih delegata.

Budući da su bili ispunjeni uslovi propisani članom 37 stav 3 Uputstva, Centralna izborna komisija BiH je bila ovlaštena za donošenje Kriterija, pa su neosnovani žalbeni navodi političkog subjekta Narodne stranke Radom za boljitak da je odluka o dodjeli mandata zasnovana na nezakonitom dokumentu. Nadalje, iz pobijanih odluka proizilazi da je Centralna izborna komisija BiH kod dodjele mandata pravilno primjenila sve elemente propisane u Kriterijima i za odluku dala jasno i argumentovano obrazloženje, pa su neprihvatljivi svi žalbeni navodi da su pobijane odluke donesene protivno zakonu čime je neosnovan prijedlog žalitelja da se odluke ponište.

Centrala Izborna komisija BiH cijenila je činjenice koje su postojale u vrijeme donošenja osporavane odluke, kada mandat u kantonalnoj skupštini nije bio dodijeljen kandidatu žaliocu iz reda srpskog naroda. Nadalje, da bi kandidat na kandidatskoj listi kvalifikovanog političkog subjekta bio uzet u obzir kod popunjavanja nedostajućih delegata, potrebno da je su ispunjeni svi uslovi iz člana 2 stav 1 Kriterija. Navedena odredba osim činjenice pripadnosti redu srpskog naroda propisuje tri kriterija za popunu nedostajućih mandata koji vezuje za broj stanovnika srpske nacionalnosti u kantonu i njihov procenat u odnosu na ukupni broj stanovnika, kvalifikovanost političkog subjekta koji ima kandidata iz reda srpskog naroda na listi i broj osvojenih ličnih glasova kandidata, koji uslovi moraju biti kumulativno ispunjeni. Žalbom se ne ukazuje da kandidat kome je dodijeljen mandat ne ispunjava kumulativne uslove, to navode žalbe čini neosnovanim. Naprotiv, CIK BiH je pravilno utvrdila da je Bosnić Nikica, kandidat iz reda srpskog naroda sa liste političkog subjekta SRPSKA LISTA u Kantonu 10 osvojio 789 glasova, što u konačnici čini najveći broj ličnih glasova, kao i da ispunjava kumulativno sve naprijed navedene uslove.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
S U D I J A
Mirsada Džindo**